



Xalq so'zi

O'zbekiston —
kelajagi
buyuk
davlat

2024-YIL — YOSHLAR VA BIZNESNI QO'LLAB-QUVVATLASH YILI

1991-yil 1-yanvardan chiqa boshlagan

WWW.XS.UZ

E-mail: Info@xs.uz

2024-yil 22-fevral, № 39 (8662)

Payshanba

Saytimizga o'tish uchun QR-kodni telefoningiz orqali skaner qiling.



O'ZBEKISTON PREZIDENTI "KELAJAK O'YINLARI"NING OCHILISH MAROSIMIDA ISHTIROK ETDI

O'zbekiston Respublikasi Prezidenti Shavkat Mirziyoyev Rossiya Federatsiyasi Prezidenti Vladimir Putinning taklifiga binoan 21-fevral kuni "Kelajak o'yinlari" musobaqasining tantanali ochilish marosimida ishtirok etish uchun amaliy tashrif bilan Qozon shahrida bo'ldi.



Qozon shahriga amaliy tashrif doirasida O'zbekiston Respublikasi Prezidenti Shavkat Mirziyoyev va Rossiya Federatsiyasi Prezidenti Vladimir Putinning uchrashuvi bo'lib o'tdi.

Suhbat avvalida davlatimiz rahbari Rossiya Prezidentini sportning an'anaviy va virtual turlarini o'zida mujassam etgan "Kelajak o'yinlari" birinchi xalqaro musobaqasi o'tkazilayotgani bilan samimiy qutladi.

Ikki tomonlama munosabatlarning dolzarb jihatlari, jumladan, o'tgan yil 5 — 7-oktabr kunlari Moskva shahrida oliy darajada erishilgan kelishuvlarni amalga oshirish masalalari ko'rib chiqildi.

Yetakchilar O'zbekiston bilan Rossiya o'rtasidagi keng qamrovli strategik sheriklik va ittifoqchilik munosabatlari izchil mustahkamlanib borayotganini mamnuniyat bilan qayd etdilar.

2023-yilda bo'lib o'tgan Hukumatlararo komissiya yig'ilishlari, hududlar, ta'lim, tibbiyot forumlari, qator boshqa ishbiaronlik va madaniyat tadbirlarining samarali natijalari yuksak baholandi.

Tovar ayirib olishning ijobiy sur'ati saqlanib qolmoqda. Sanoat, energetika, transport, kimyo, farmatsevtika va boshqa tarmoqlardagi loyihalar faol bosqichga kirgan.

Hududlar o'rtasidagi kooperatsiya aloqalarini rag'batlantirishga alohida e'tibor qaratildi.

Toshkent va Jizzax viloyatlarida "Ximgrad" industrial texnoparklari muvaffaqiyatli ishlayotgan. Buxoro va Navoiy viloyatlarida yangi "Alabuga" va "Master" innovatsiya parklari barpo etilmoqda.

Davlat rahbarlari transport yo'laklarini birgalikda rivojlantirish, temir yo'l transporti sohasidagi hamkorlikni mustahkamlash masalalarini muhokama qildilar.

Mintaqaviy kun tartibi yuzasidan ham fikr almashildi, bo'lajak xalqaro tadbirlar rejasi ko'rib chiqildi.

Shundan so'ng O'zbekiston Respublikasi Prezidenti Shavkat Mirziyoyev Qozon shahrida "Kelajak o'yinlari" birinchi xalqaro multisport musobaqasining tantanali ochilish marosimida ishtirok etdi.

"Qozon Ekspo" xalqaro ko'rgazmalar markazida bo'lib o'tgan tadbirda Rossiya Federatsiyasi Prezidenti Vladimir Putin, Belarus Prezidenti Aleksandr Lukashenko, Qozog'iston Prezidenti Qosim-Jomart Toqayev, Qirg'iziston Prezidenti Sadir Japarov, Tojikiston Prezidenti Emomali Rahmon va boshqa xorijiy mehmonlar ham qatnashdi.

Ishtirokchilar e'tiboriga "Kelajak o'yinlari" dasturiga kirgan sport turlari haqida videolavha va teatrlashtirilgan sahna ko'rinishi taqdim etildi.

Davlatimiz rahbari ishtirokchilarga

omad tilab, 2026-yilgi "Kelajak o'yinlari"ni O'zbekistonda o'tkazishni taklif qildi.

Marosimdan so'ng oliy martabali mehmonlar maxsus ko'rgazma bilan tanishdilar. Virtual makondagi bellashuvlar va an'anaviy sportni o'zida mujassam etgan "fijital-sport" konsepsiyasi to'g'risida ma'lumot berildi.

Yetakchilar kibersport musobaqalarini, fijital-futbol bo'yicha mashg'ulotlar jarayonini kuzatdilar, sportdagi yangi yo'nalishning bugungi rivoji va istiqbollari haqida hikoya qiluvchi tasviriy san'at namunalari va taqdimotlar bilan tanishdilar.

"Kelajak o'yinlari" — bellashuvlar bir vaqtning o'zida sportning an'anaviy turlari va ularning raqamli muqobilarda o'tkaziladigan yuqori texnologik musobaqadir. U joriy yilning 21-fevral kuni 3-mart kuni qadar davom etadi.

Tumirda 100 dan ortiq mamlakatlardan qariyb 300 ta jamoa, shu jumladan, O'zbekiston vakillari ishtirok etmoqda. Yurtdoshlarimiz fijital-xokkey, virtual velopoyga, sport dasturlash kabi yo'nalishlarda kuch sinashadi.

Shu bilan O'zbekiston Respublikasi Prezidenti Shavkat Mirziyoyevning Qozon shahriga amaliy tashrifi yakunlandi.

O'ZA.

O'zbekiston Respublikasi Prezidenti Matbuot xizmati surati.

O'zbekiston Respublikasining QONUNI

"To'lovga qobiliyatsizlik to'g'risida"gi

O'zbekiston Respublikasi Qonuni qabul qilinganligi munosabati bilan

O'zbekiston Respublikasining ayrim qonun hujjatlariga o'zgartirish va qo'shimchalar kiritish haqida

Qonunchilik palatasi tomonidan 2023-yil 10-oktabrda qabul qilingan
Cenat tomonidan 2023-yil 20-dekabrda ma'qullangan

Keyingi yillarda mamlakatimizda tadbirkorlik subyektlarini qo'llab-quvvatlash, ularning manfaatlarini himoya qilish bo'yicha izchil islohotlar amalga oshirilmoqda.

Amalga oshirilayotgan islohotlar doirasida to'lovga qobiliyatsizlik holatiga tushib qolgan tadbirkorlik subyektlarining to'lov qobiliyatini tiklash tartib-taomillarini qo'llash orqali ularni moliyaviy jihatdan sog'lomlashtirish amaliyoti keng joriy etilmoqda. Bundan tashqari jismoniy shaxslarni to'lovga qobiliyatsiz deb topish asoslari va buning oqibatlarini qonunchilik darajasida belgilab qo'yildi.

Shu bilan birga "To'lovga qobiliyatsizlik to'g'risida"gi O'zbekiston Respublikasi Qonunining qabul qilinishi uning qoidalarini bir xil qo'llanilishi uchun amaldagi qonun hujjatlarini normalarini unga muvofiqlashtirish zarurati keltirib chiqardi.

Ushbu Qonun bilan O'zbekiston Respublikasining qonunlari va kodekslariga jismoniy hamda yuridik shaxslarning to'lovga qobiliyatsizligi aloqalari, shuningdek to'lovga qobiliyatsizlik to'g'risidagi qonunchilikni buzganlik uchun javobgarlikka tortish asoslari aniqlashtirilishini nazarda tutuvchi o'zgartirish va qo'shimchalar kiritilmoqda.

Mazkur Qonun "To'lovga qobiliyatsizlik to'g'risida"gi O'zbekiston Respublikasi Qonunining ijrosi samarali tashkil etilishini ta'minlashga, uning huquqiy qoidalarini qo'llashda turlicha talqinlar va qarama-qarshiliklar bartaraf etilishiga xizmat qiladi.

(Davomi 2, 3-bettarda).

BIZ — DUNYOGA, DUNYO — BIZGA OCHIQ BO'LISHI KERAK

Prezidentimiz qo'ygan bu talab O'zbekistonning xalqaro munosabatlardagi ustuvor tamoyilidir

O'zbekiston jahonning barcha mintaqasidagi sheriklar bilan o'zaro manfaatli hamkorlik uchun hamisha tayyor. Xususan, xalqaro ekspertlar qayd etganidek, keyingi yillarda davlatimiz G'arb bilan munosabatlarni mustahkamlashga intilmoqda. Ayniqsa, tashqi siyosatda Yevropa mamlakatlari bilan yangi formatdagi muloqotlarga keng o'rin berilyapti.

Mushohada

Birgina 2023-yildagi voqealiklar silsilasini tahlil qilaylik. O'tgan yili Yevrokengash rahbarining O'zbekistonga tashrifi, "YI — Markaziy Osiyo" formatidagi sammit, O'zaro bog'liqlik bo'yicha xalqaro konferensiya va iqtisodiy forumlar, Fransiya, Germaniya, Italiya, Vengriya hamda Chexiya yetakchilari bilan uchrashuvlar muvaffaqiyatli o'tkazildi. Budapesht va Stokgolmda elchixonalar ochildi.

Davlatimiz rahbari 18-sentabr kuni Nyu-York shahriga tashrifi doirasida Yevropa Kengashi prezidenti Sharl Mishelni qabul qildi. Ushbu mintaqaning yetakchi kompaniyalari bilan birgalikda yirik investitsiya loyihalari amalga oshirilmoqda, muhim madaniy tadbirlar uyushtirilyapti.

Muloqotlar chog'ida Kengaytirilgan sheriklik va hamkorlik to'g'risidagi bitimni tez fursatda qabul qilish, o'zaro savdo va investitsiyalarni ko'paytirish uchun qulay sharoitlar yaratish, iqtisodiyotning asosiy tarmoqlarida kooperatsiyani chuqurlashtirish masalalari muhokama qilinayotir.

Bizni bog'lab turgan mustahkam rishta

Yevropa Ittifoqi O'zbekistonni Markaziy Osiyodagi strategik hamkori, deb biladi. Biz uchun esa ko'hna qit'a juda katta bozor. Chunki bu hududda yarim milliard aholi, ya'ni 500 million iste'molchi istiqomat qiladi. Shu ma'noda, YI bilan munosabatlarda davlatimizni qiziqtiradigan birinchi omil, bu — savdo. O'zbekiston Yevropa Ittifoqi bilan savdo munosabatlari tubdan kengaytirishdan, barqaror savdo-logistika zanjirlarini va o'zaro mahsulot yetkazib berishni qo'llab-quvvatlashning samarali mexanizmlarini yaratishdan manfaatdor.

E'tibor bering, 2020-yilda yevrohududdagi 28 mamlakat 1,9 trillion yevrolik mahsulot importini amalga oshirgan. Biroq YI o'shanda yurtimizning eksport yo'nalishi ro'yxatida 7-o'rinni band etgan.

O'zbekiston 2021-yil 10-apreldan Yevropa Ittifoqining barqaror rivojlanish va samarali boshqaruv bo'yicha maxsus preferensiyalar tizimi (GSP+) doirasidagi

imtiyozlardan foydalanish imkoniyatiga ega bo'lgach vaziyat mutlaqo ijobiy ko'rinish kasb etdi. Boshqacha aytganda, ko'hna qit'a bozori uchun yangi imkoniyatlar eshigi ochilgandan so'ng YI bilan tovar ayirib olish hajmi o'tgan yili qariyb 70 foizga o'sdi.

Yevropaning yetakchi kompaniya va banklari bilan yuqori texnologik ishlab chiqarish va yangi ish o'rinlari yaratish bo'yicha istiqbolli loyihalar portfeli 20 milliard yevrodan ziyodni tashkil etmoqda.

Bunday misollar tafsilotiga chuqur to'xtalishdan avval "GSP+" tizimi, uning afzalliklari haqida qisqacha ma'lumot berib o'tsak.

"GSP+" tizimining qanday afzalligi bor?

"GSP+" (Generalised Scheme of Preferences Plus) — rivojlanayotgan mamlakatlar eksportini qo'llab-quvvatlashga qaratilgan umumiy imtiyozlar tizimi. U shunday davlatlar chetga sotadigan tovarlar uchun bojxona tariflaridan imtiyozlar berishni ko'zda tutadi. Bunday imkoniyatlar deyarli barcha turdagi sanoat va ayrim qishloq xo'jaligi mahsulotlariga nisbatan qo'llaniladi.



Dunyo nigohi

INSON KAPITALINI RIVOJLANTIRISH — USTUVOR VAZIFA

Xorijiy ekspertlar O'zbekiston Prezidentining Rossiyaga tashrifi haqida

O'zbekiston Prezidenti Shavkat Mirziyoyev Rossiya Prezidenti Vladimir Putinning taklifiga binoan 21-fevral kuni "Kelajak o'yinlari" musobaqasining tantanali ochilish marosimida ishtirok etish uchun amaliy tashrif bilan Qozon shahrida bo'ldi.

Tashrif davomida O'zbekiston va Rossiya davlat rahbarlarining ikki tomonlama uchrashuvi o'tkazildi. Unda 2023-yil 5 — 7-oktabr kunlari Rossiyaga rasmiy tashrif yakunida erishilgan oliy darajadagi kelishuvlarni amalga oshirish hamda keng qamrovli strategik sheriklik munosabatlari yanada chuqurlashtirish masalalari muhokama qilindi.

Eslatib o'tamiz, Rossiyada ilk bor tashkil etilayotgan va 21-fevral — 3-mart kunlari bo'lib o'tadigan "Kelajak o'yinlari" sportning an'anaviy turlari, ilmiy ishlanmalar va raqamli texnologiyalarni o'zida mujassamlagan musobaqadir. Ushbu yirik sport tadbirida 100 dan ortiq mamlakatlardan qariyb 300 ta jamoa, jumladan, O'zbekiston sportchilari ham qatnashmoqda.

Xalqaro ekspertlarning fikricha, haqiqiy va kibersportni o'zida jamlagan ushbu innovatsion musobaqa formati MDH yangi jahon tendensiyalari asosida rivojlanib borayotganining muhim ko'rsatkichidir.



IJTIMOY HIMOYAGA MUHTOJ AHOLI BILAN ISHLASH TIZIMI O'ZGARADI

Ijtimoiy himoya sohasidagi xizmatlar qamrovini yanada kengaytirish va ehtiyojmand aholini har tomonlama qo'llab-quvvatlash maqsadida

40 ta tumanda reabilitatsiya, sog'lomlashtirish va nogironligi bo'lgan shaxslarga qaraydiganlarni o'qitish bo'yicha ko'p tarmoqli ijtimoiy xizmatlar markazlari ishga tushiriladi.

Bu orqali 60 ming ehtiyojmand aholi ijtimoiy xizmatlar bilan qamrab olinadi, ularga qarayotgan 3 ming kishi o'qitiladi.

Hozir nafaqa olayotgan, lekin mehnat qilib daromad topish istagida bo'lgan 660 ming aholi uchun zarur sharoitlar yaratilishi ularning ijtimoiy va moddiy farovonligi yaxshilanishiga xizmat qiladi.

Olish mumkin bo'lgan protez vositalari 18 turdan 30 turga, bunga ajratilayotgan mablag' 1,5 barobar oshirilib, 100 mlrd. so'mga yetkaziladi.

Fakt va raqamlar

kelgusi yildan



